



Komunikadu Imprensa **1 Juñu 2024**

Komemorasaun loron Internasionál ba Labarik: JSMP husu atu aseguira protesaun adekuaudu ba labarik sira

Iha 01 Juñu kada tinan nasaun sira hotu iha mundu tomak selebra loron internasionál ba labarik sira. Iha loron ne'e mak sai nu'udar loron ne'ebé nasaun sira iha mundu tomak hatudu sira nia respeitu ba direitu labarik hahú hosi direitu ba moris, justisa, edukasaun, saúde no direitu sira seluk. Iha tinan ida ne'e, Estadu Timor-Leste komemora loron internasionál ba labarik ho tema "Labele Explora Labarik nia Direitu, Eduka Labarik hodi Haksolok no Aprende."

Haree ba realidade moris iha Timor-Leste hatudu katak labarik barak mak sei hasoru aktu diskriminasaun ba sira nia direitu hodi asesu ba justisa, edukasaun, saúde no moris ne'ebé livre hosi kualker violénsia hasoru labarik sira.

"Estadu Timor-Leste liuhosi instituisaun relevante sira halo ona esforsu oi-oin, atu dezenvolve labarik no enkoraza partisipasaun labarik iha aspeitu hotu-hotu. Mezmu nune'e, labarik barak mak sei kontinua luta atu hakotu korente violénsia doméstika, violénsia seksuál no abuzu seksuál hasoru labarik fetu sira, no diskriminasaun ho forma oin-oin ne'ebé sira hasoru," dehan Sra. Ana Paula Marçal, Diretora Ezekutiva JSMP.

Iha Feveiru 2023, Parlamentu Nasionál aprova ona Lei Nú 6/2023 kona-ba protesaun labarik no foin sa'e iha perigu ne'ebé apresenta hosi governu hodi regula kona-ba definisaun ba labarik no oinsá labarik sira bele hetan protesaun espesiál no mós protesaun sosiál. JSMP espera katak ho lei protesaun labarik no foin sa'e iha perigu bele tulun governu fasilita kondisaun ne'ebé adekuaudu ba labarik sira hodi ezerse sira nia direitu sira ne'e hotu.

Bazeia ba rezultadu monitorizaun JSMP nian iha tribunál judisiál primeira instánsia hotu hahú hosi Janeiru 2023 to'o Dezembru 2023, JSMP konsege monitoriza kazu ne'ebé envolve labarik hamutuk 57, kazu sira ne'e mak hanesan kazu violénsia seksuál, violénsia fíziku, ezersísiu poder paternál no krime sira seluk. Número ne'e la repzenta totál kazu ne'ebé tribunál judisiál primeira instánsia sira julga, no JSMP fiar katak iha número barak liu ida ne'e, ne'ebé lakonsege lori to'o mai sistema justisa formál.

Hosi kazu ne'ebé JSMP monitoriza hatudu katak labarik barak mak seidak goja sira direitu sira ne'e ho di'ak, nune'e hein katak liuhosi komemorasaun loron mundiál ba labarik, fó biban ba komponente sosiedade Timor-Leste tomak hodi hanoin no refleto saida mak prezisa hametin di'ak liután iha futuru no hadok labarik sira husi forma violénsia no diskriminasaun hotu-hotu.

Atu hetan informasaun kompleitu, favor kontaktu:

Ana Paula Marcal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl

